


DIJIKIIBWA

 Taatù wa mu Dyulu mubènèshiiibwe, ne—ne Bwikadi bwà Nyumà Mwímpè bukààdi mwab'ewu ebu, nyewù tuseemena ku Díyì Dyèbè dyà Cijila. Nènkù nànsha mùndi ne díyì dinyangùke mwikalè nteeta kudyèngeleka emu, ne ngaakula mèyì bitekètèbitekètè ne bishìmàte ne mwànyì mwònsò, Ndi ndòmba bulombodi Bwèbè bwà Nzambi ne dilaabiibwa dyà Nyumà Mwímpè bwà kukwàtabù mudimu munkaci mwètù dilòòlò edi. Nènkù swàku bwà Yèyè Udi myaba yònsò awu, swàku bwà Àngatè Díyì dyà Nzambi ne àDìfilè kùdì mwoyi wònsò, bilondeshila mutùdi naadi dijinga. Swàku bwà Yèyè àtùdiishè dilòòlò edi, ne bintu bìmpè byà Nzambi.

2 Nènkù dilòòlò edi, patùdi twakula pa Díyì apa, swàku bwà myoyi yètù yìbwele munda mwà Kalvariyo ntántà wa kilomèeta yàbúngi, mwàkafutà Yesù musinga wùdì mukùmbàne mu byònsò wàkalòmbiibwà ku mapangadika manènè à Nzambi awu, kubangila mu budimi bwa Edènà. Nènkù swàku bwà leelù ewu tùfikè ku dimanya ne tudi babingishiibwe cyanààna ku dibìikà Dyèndè dyà ku lufù, ne ku lufù, dijiikiibwa, ne dibìikà Dyèndè dyà ku lufù.

3 Nènkù dilòòlò edi katùcyenà kàbìdi bàà pa buloba nànsha, bwalu tudi basùmbiibwe ku musinga wà Mashi à musinga mukolè à Mwànà wa Nzambi. Nènkù swàku bwà ne, ne myoyi yà disàkidila, tükudimukilè Kùdì dilòòlò edi, ne meeji ónsò ne dikàndà, bitùdi naabi munda mwètù, ne tükukwàcìlè mudimu ne mwoyi mukezuke, kawùyi ne cinga cintu to.

4 Enzàku nankù dilòòlò edi, Taatù, bwà ne kwòkò muntu mwab'ewu udi kàyì muKumanyè, mu difwidiibwa dyà luse ku mpèkaatù yèndè, swàku bwà àlwe dilòòlò edi ku nkùrusè ne kudìpwekesha kwònsò, ne kwòkò aku àtondè mpèkaatù yèndè kùdì Nzambi udi mwakàne, bwà kufwa luse. Ne swàku bwà edi diikalè dilòòlò dinène bwètù bònsò. Tudi tulòmba nùnkù mu Dìnà dyà Mwan'Èbè, Mukalenge Yesù. Amen.

5 Mpindyewu tudi tujungulula bulelèlè ne kakwèna muntu nànsha umwe, pa buloba, udi mukùmbàne menemene bwà kwangata Díyì dyà Nzambi ne kuDìbuulula to, bwalu Díyì ndifùndiibwe ku disonsodiibwa. Nyumà Mwímpè ngudi Mwena Díyì.

6 Nènkù pàakakèbàbo, mu Dyulu, muntu bwà kwangata Mukàndà ne kulamuna Bitampì, kakwàkapeteka muntu nànsha umwe mu Dyulu, anyì pa buloba, anyì mwinshì mwà buloba to, uvwa mukùmbànyine mwà kulamuna Bitampì, anyì mene kutàngila Mukàndà awu to. Kàdi kùvwa Mwànà wa mùkòòkò Mwaba awu wàkashipiibwa kacya ku difùkà dyà dyulu ne

buloba, ne Yèyè wàkalwa ne wàkangata Mukàndà mu cyanza cyà Ewu uvwa musòmba pa Nkwasa wa butùmbi awu, ne wàkalamuna Bitampì ne kukangula Dìyì.

⁷ Nènku tudi tuMwitabuuya ne tuMweyemena dilòòlò edi ne, Yèyè neàtukàngwile Dìyì, ne pàndì mpindyewu mbala mu nshapità mwi2 wa Byenzi apa.

⁸ Ànu múmvwà mufile, dilòòlò dyà kumpàlà òvwa n’*Dilwa Diibidi*, ne . . . dyà Mukalenge Yesù, cìvwa mmu diisàtù. Nènku mu diinayi dilòòlò cìvwa *Mulàmbù Ùdi Mukumbàne Mu Byònsò*. Nènku mu diitànù dilòòlò cìvwa *Difuta Dyà Cibawu Didì Dikumbàne Mu Byònsò; Cipwàngàne*. Nuvwa bacyúmuvwè makèlèlè dilòòlò awu anyi? *Cipwàngàne*, kakùyi mpàtà to mutùdi mwà kwikala katùyi ne cyà dibandiibwa naaci ne bapwàngàne ku mèsù kwà Nzambi! Kàdi dilòòlò edi mpa *Dijükubwa*. Ne mààlabà: *Dibùkà Dyà Ku Lufù*. Ànu mùdi matùkù àlondangana amu’s.

⁹ Mpindyewu ndi musungùle dilòòlò edi, bwà kubala kwànyì kwà Mufundù, mu Mukàndà wà Byenzi, nshapità mwi2 ku mvensà wa 25, wa 26, ne wa 27 kabidi. Nènku Ùdi ùbadiibwa nùnkù ewu, Peetèlò ngudi wakula awu.

Davidi, bwalu Davidi wàkaakula bwà bwalu bwèndè ne, Ngàkadyànjila kumòna misangu yònsò Mukalenge kumpàlà kwànyì, bwalu yèyè udi ku dyabalumè dyanyì, bwà ncinyungishiibu nànsha:

Ki bwà cinyi mwoyi wànyì wùdi wùcyònkómoka, ne ludimì lwànyì luvwa ne disànka; kàbidi mubidi wànyì newikishè mu ditèkemena,

Bwalu wèwè kwàkulekela musùukà wànyì mu ifernò, anyì kwàkwitaba bwà Wa Cijila wèbè àmonè dibola nànsha.

¹⁰ Mufundù bulenga kaayipu wà kubala dilòòlò edi, bwà kupeta dyumvwija dya muvwa Yè mu lukità.

¹¹ Cintu cyà kumpàlà citùdi baswè kutàngila . . . kukòkelakù ntèmà yènù, ndibènga-kupangila dyà Dìyì dyà Nzambi. Nzambi ùtu ùshààla mukwàte ku Dìyì Dyèndè, ku dileetà ne ku dileetà. Nènku dilòòlò edi tudi baswè kushindamijila meeji ètù pa cyòci aci, cyà ne Nzambi ùtu ùshààla mukwàte ku Dìyì Dyèndè. Tudi mwà kushààla batwishibwe bwà cintu kanà cyònsò cidi Nzambi mwambè mu Dìyì Dyèndè ne, m’Bulelèlè. Ne diitabuuya kaditu dishindameena pa luntekà lwà meeji a muntu anyi tèlòlòji wa muntu nànsha, kàdi ditu ne ciikishilu cyàdi pa Lubwebwe lùtù kalùyi lùnyunga lwà Dìyì dyà Cyendèlèlè dyà Nzambi.

¹² Dìyì! Nzambi Yèyè anu mucyambè, m’Bulelèlè ànu kashidi. Kènàku mwà kucyùmusha kàdi kulwa kwamba ne: “Kí ncíMvwà muswè kwamba” to. Mèmè ndi mwà kwamba maalù ne wèwè udi mwà kwamba maalù, pasiishe tudisangana benzèjilbwe bwà

kubyùmusha, bwalu tuvwa bacyámbe mu dyètù pèètù dimanya dyònsò ne mwètù pèètù mutùvwà bakùmbànyine mwà kwamba amu. Kàdi, díbà adi, Nzambi mmushìilàngàne neetù bikolè. Yéyè kèna ne mikàlu to, ki bwà cinyì kakuyi mpatà to Yéyè kèna wàmba cintu nànsha cimwè pàdici kaciyi cipwàngàne to. Kacya kabitukù bikèngela bwà kucyùmushaYè, kabitukù bikèngela bwà kulòmbaYè luse bwà cidiYe mwambè to. Cìdi cishààla misangu yònsò ànu kacya ciimana, Bulelèlà.

¹³ Nànsha Yesù mene, mu matùkù manène atùdi munkaci mwà ditwà cyanga aa, pàakashipà Nzambi mu bulelèlà Mwan'Èndè bwà mpèkaatu yà bàà pa buloba, cívwa pàmwàpa mbinunu byà bidimu kumpàlà mene kwà bishìmikidi kutèkiibwabi. Nzambi wàkaakula Díyì, ne Dyòdi ncintu cijikija mu Dyulu pàdi Nzambi ùcyàmba apu; cikaadi cimana kujikija. Kaa, twìkalapù ànu mwà kubàkula cìdici cyùmvwija, nùnkù's tuvwa kwikala bantu bashìilàngàne! Pa kumòna mu Mikàndà Yèndè, manyooka àdi matèèka mwòmò emu bwà beena cishikù, ncifwànyine kufikisha muntu ku didikenketa, ku díbà ne ku díbà; kadi ncifwànyine kufikisha baakàne ku dicyòkomoka, ku díbà ne ku díbà, pa kubala mabènesha àdi Nzambi mulayè beena lulamatu. Nenkù tudi mwà kushààla batwìshìibwe ne Díyì kàna dyònsò nedikumbanè, kumbà kwelamù lwongò lwà musùuka wètù. Bitu ànu nankù misangu yònsò.

¹⁴ Pààkaakulà Nzambi ne Noà, mu bikondo byà kale kumpàlà kwà mvùlà yà Noà; cívwa pàmwàpa mwà kwikala nkumpàlà kwà Bible kàyi mwanji kufùndiibwa, anyi Bible ewu, nànsha bìshi, kàyi mwanji kufùndiibwa to; Nzambi wàkambila Noà ne kùvwa kùlwa mvùlà wa cipùpù, ne màyi àvwa mwà kubwikila buloba. Kàdi kakùyikù kaacileeeji nànsha kàmwè kàà ne cívwa cifwànyine kwenzeka to, bintu byònsò bìbèngangana, Noà wakakàtamuka ne bwòwà, ne wàkiibaka bwàtù, kubùlongololayè. Cívwa mbwà disùngila dyà bàà mu nzùbù mwèndè ne yéyè mwinè. Nzambi kàakamutekeshaku mu mabòko to, bwalu cívwa n'Díyì Dyèndè. Bivwa ne cyà kwenzeka pàvwà Nzambi mwambè ne nebyènzekè apu.

¹⁵ Mpindyewu, pàvwa Yobò, Mukàndà wà mutàmbe kwikala wà kale mu Bible awu, wàkafùndiibwà pàmwàpa kumpàlà kwà Genèsè kàyi mwanji kufùnda, kàdi wàkabwejiibwa mu Bible. Ne Mòse ngwàkafùnda Genèsè. Yobò, mu Mukandà wèndè, wàkashààla mwimànyine kakùyi tuseku to pa mulayi wàkamwenzelà Nzambi. Ne wàkashààla mwimànyine pa mulambu wèndè mwòshà awu, kàyi ne bwòwà nànsha bwa kànà munda mwà mwoyi wèndè to; mumanyè ne, cívwa Nzambi mwambè, Nzambi ùvwa ne bukolè bwà kucyènza. Ne pàvwàbi bìmwèka bu ne maalu ònsò avwa aya anu lubòko, Yobò ùvwa mwimàne kamùngùlù bwalu mulayi wà Nzambi kawùvwa wùnyunga to. Nzambi wàkalaya Yobò, ne Yobò wàkashààla mwimànyine pa mulayi awu.

16 Kaa, èkèleeziyà wikalakù mwà kufika mwab'awu wà mufwànyina kushààla mwimànyine kakùyì tuseku to pa Díyì dyà Cyendèlèlèlè dyà Nzambì ne m'Bulelèlè's wè! Ndishìilangana kaayi divwà difwànyine kwikalakù, ndilongolodiibwa kaayi divwà difwànyine kwikalakù, ndisonjiibwa kaayi divwà difwànyine kwikalakù, ndisankà kaayi divwà difwànyine kwikalakù, mbukolè kaayi ùvwà bufwànyine kwikalakù, bu balùme ne bakàjì mwà kutwà Nzambì mushinga bwà ne, cidìYe mwambè m'Bulelèlè. Maalu àdì ènzekà nànsha miikàle bishi, aci kacýèna ne bwalu nànsha bùmwe bwà dyanza ne cyôci aci to. Nzambì ngudi mwambe nàнку; aci ncikòse bwalu!

17 Kàdi Yobò, pàvwàye ùsanganyiibwa mu cikondo cyèndè cyà diteeciibwa ditàmbe bukolè cya dilabula dyèndè dyònsò; pàakasanganyiibwàye, muntu mwakàne, mu Bwikadi bwà Nzambì. Nànsha Nzambì mene wàkamba ne yèyè ùvwà mupwàngane. Kakùvwa wa bu yèyè nànsha umwe pa buloba to. Ki Sàtaanà kupèèshiiibwayè mpùngà wa kumuteetayè, pàakambàye ne: “S'némufikishe ku diKwela mulawu muKutàngile mu mpàla.”

18 Ki yèyè kwamba kwangata mwoyi wa Yobò, ne ùvwà mufwànyine kwikala mwenzè nàнку, kàdi Nzambì ùvwà mwelè mkàlu, mwambè ne: “Udi mwà kumwenzela cintu kàna cyònsò, kàdi bwà mwoyi wèndè kwàngacikù to.”

19 Pashiishe pààkiimanà Yobò mu diteeciibwa dikole dyà díbà dyà bwalu butondè, wàkamba ne: “Ndi mumanyè ne Mupikudi wanyì ùdi ne mwoyi, ne ku matùkù a ndekeelu Yèyè neimanè pa buloba. Nànsha misàndà yà mu dikòba mibùtùle mubidi ewu, nànsha nàнку mu mubidi wànyì nèmmonè Nzambì.” Nànsha mùvwàbì bimwèke mifitù yà bishi, nànsha mùvwàbì bimwèke bu ne kí mbilelèlè bishi, kùvwa cintu kampàndà cívwa Yobo mwelèmu lwongò lwà musùkà wèndè, mulayi wà Cyendèlèlèlè wà Nzambì. Kaa, twìkalapù mwà kwenza nàнку's wè! Mònaayi, yèyè wàkashààla mwimànyine pa mulayi ne: “Ndi mumanyè ne Mupikudi wanyì ùdi ne mwoyi.”

20 Nènku ndi muswè bwà nùmonè, bwà mèyi àcilwalwà àndì njinga kwamba, Yobò wàkasunguluja mwaba wà dijiikiibwa dyèndè. Nènku pààkafwà Yobò, wàkajiikiibwa mùshindù awu.

21 Kùvwa muntu mukwàbò, dyèndè Abraham, wàkawkàcila Nzambì ku Díyì Dyèndè. Ne yèyè wàkiitabuuja Nzambì. Ne yèyè wàkabiikila bintu bìvwa bibènganganà ne mulayi ùvwà Nzambì mumupèèshè awu abi, bu ne kabìvwakù to. Wàkawkàcila Nzambì ku Díyì Dyèndè. Nènku pààkapità matùkù, ne mbingu ne ngondo, nànsha mene ne bidimu kupitabi, aci kacýàkawkàcishakù Abraham bwôwà nànsha bukesè to. Bible mmwambè ne: “Yèyè kaakatènkakanakù, ku bupidyà, ku mulayi wà Nzambì to; kàdi ùvwà ne lulamatu, ùtumbisha Nzambì.”

22 Pàvwà bintu byônso bimwèka, ditùkù dyônso ne, lutàtù lùvwà lwènda ànu lùvula ditùkù dyônso; kàdi pamutù pàà kutàmbaye kuteketa, Yobò ùvwà ùtamba kukolakana ditùkù dyônso. Kaa, ditwishiibwa kaayi dibènèshìibwe ditùdi naadi's wè! Pàdi lutàtù lùmwèka bu lùdi lùjuukà bwà kuvwija cintu cidi Nzambi mulayè, bu ne kacýèna mwà kwenzeka, pamutù pàà kukwàcika bwôwà, kwalukila mu maalu a pa buloba, bìvwa bitùkèngela kwimana kamùngùlù kutàmba ne mutùvwà bimàne kwônso eku, pa EMU MMÙDÌ MUKALENGE WÀMBA. Bivwa bikèngela kukòsaci bwalu, pàdi Nzambi wàmba cintu kampàndà apu.

23 Nènku Abraham wàkabiikila bintu bìvwàku abi, bu ne kabìvwakù to, bwalu bìvwa bibèngàngàne ne Díyì. Nènku Abraham pààkajìmijàye munanga wendè uvwa mukàjèndè, Sarah awu, paanyimà pàà bidimu byàbùngì byà basòmbe pàmwè, yèyè wàkasùmba katùpà kàà buloba pabwipi ne mwaba wùvwà Yobò mujiikiibwe, e kujiikayè Sarah. Udi udìkonka ne mbwà cinyi anyi? S'bàvwa bapròfetà! Bàvwa bàmonà! Bàvwa bàpetangana ne Nzambi! Nènku mpindyewu pààkafwà Abraham, yèyè wàkajiikiibwa ku luseke lwà Sarah.

24 Mpindyewu, kàakaswà bwà balùmyànà aba kumupèeshabò citùpà cyà buloba aci to. Yèyè wàkacisùmba, kumpàlà kwà bantèmù. Mmufwanu kàayi mulenga wa dibatiiza's wè. Yèyè wàkacisùmba, kumpàlà kwà bantèmù, bwà kushàalaci cintu cyèndè yèyè. Kaa, mùshindù awu ngùvwàbi bikèngela bwà mwena kwitabuuja mulelèlè kulwayè, kàyi ùdìfindila mu ditumba to, kàdi wìmana kumpàlà kwà bantèmù ne: "Ndi ntèmù wa Mukalenge Yesù, ne wa Nyumà Mwimpè, ne wa byenzedi Byèndè binène," nangàngà patùdi tutàmba kumòna ditùkù dibì edì dyènda diseemena.

25 Ki pashiishe pàvwà mwànà wa Abraham, uvwa Izàkà, wùvwà mulayì ne cyà kumupèebwa awu. Nènku pààkafwà Izàkà, wàkajiikiibwa mwaba wùmwe ne Abraham. Ne Izàkà wàkalela Yakòbò.

26 Nènkù pavwa Yakòbò. . . wàkafwila mu Èjiipitù mwàmwa. Kàdi mònaayi ne, kumpàlà kwà kufwàye, wàkambila mwanèndè wa balùmè mupròfetà, Yòzefù awu ne: "Lwàku apa, mwanàanyi wa balùme, ùteekè cyanza cyèbè pa cikundùkundù cyànyì cidi cikòyòbòke eci." Bwalu vùlukàayi mwàkatèngununyiibwàye, mbwalu Mwanjelo wa Mukalenge wàkamulenga pa cikundùkundù aci, ki kushàalayè ùtebuka kubangila ku ditùkù adi. Yèyè ne: "Tèeka cyanza cyèbè pa cikundùkundù cyànyì apa, ùdicipè kùndì kùdi Nzambi wa baataatù bèètù, bwà ne kwàkunjiika muneemu mu Èjiipitù nànsha." Bwà cinyi? Kaa, bàvwa ne Díyì, bàvwa ne dibuulula's!

27 Nènku ngánji ngìmanèku mwaba ewu, bwà kwamba ne èkèleeziyà wa Nzambi udi ne mwoyi mmwibakila pa dibuulula

dyà kùdì Nzambì; kî mpa dingumba, pa malongolodi to, kî mpa twitabàayi anyi pa malongesha to, kàdi pa Bulelèlà bubuulula bwà nyumà bwà Nzambì udi ne mwoyi.

²⁸ Abèlè, mu budimi bwà Edènà, ùvwa naabù pààkabangà èkèleeziyà. Mmunyi mwàkamanyàye bwà kutwala mwànà wa mùkòòkò? Bwà cinyi kààkatwàla bimuma mwàkabitwàla Kaayinà amu? Kàdi cyàkamubuuludiibwa's!

²⁹ Yesù wàkula musangu kampàndà, wàkamba ne: “Bantu bàdi bàmba ne ndi Nganyì Mèmè Mwànà wa muntu?”

“Bàmwe mbambè ne Wèwè udi ‘Mòsà,’ ne ‘Eliya,’ ne bikwabo.”

Yèyè ne: “Kadi nwènù nudi nwamba ne Ndi Nganyì?”

³⁰ Nudi numòna's, kabyèna bishìndameena pa cìdì muntu mukwàbò kampàndà wèla meeji to, mpa cyùdi wèwè mumanyè ne m'Bulelèlà aci. “Udi *wèwè* wamba cinyi?” Lukonko alu's ndufwànyine kukùngamangana ne yònsò wa kutùdi dilòòlò edi ne: “Udi wèwè wamba cinyi?”

³¹ Ki Peetèlò ne lùkàsà lwònsò kwakulayè, kàyì wèlakanakù to, kwambayè ne: “Wèwè udi Kilistò, Mwànà wa Nzambì udi ne mwoyi.”

³² Bu Yesù Uvwa mumanyè maalu masokomè a mu myoyi yònsò awu, bwalu Yèyè kàvwa nî nganyì nî nganyì mukwàbò to ànu Yèhowàh mumwènèshìibwe mu mubidi, kî kwambaYè ne: “Udi mubènèshìibwe, Simonà, mwànà wa Yonà, bwalu mubidi ne mashi kî mbìdi bikubuulwile eci to, kàdi Taatù Wanyì udi mu Dyulu ngudi mwenzè cyòcì eci. Nènku pa lubwebwe elu Nèngiibakilèpu Èkèleeziyà Wanyì, ne biibi byà ifernò kabyèna mwà kuMutàmba bukolè to.”

³³ Ne twètù bantu patùdì tufikapù, twètù ba-Luthériens tudi baswè kwenda ku diitabuuja, twètù ba-Méthodistes tudi baswè kwela mbilà bwà kuMupeta, nwènù beena Mpenta nudi baswè kwakula mu myakulu bwà kuMupeta, kàdi aci cìdi kule naaCì mu ntàntà wa miliyò dikùmi ne yisambòmbò yà kilòmèetà.

³⁴ Ndibuulula dyà kùdì Nzambì dyà Mukalenge Yesù Kilistò, Mupersonà wa Buumùntù Bwèndè mumwènèshìibwe mu mwoyi: “Pa lubwebwe elu Nèngiibakilèpu Èkèleeziyà Wanyì, ne biibi byà ifernò kabyàkuMutàmba bukolè to.” Bidi bipetangana ànu menemene ne Maatàayi ku 24, 5.24, anyi, Yone Munsantu 5.24 ne: “Ewu udi umvwa Mèyi Àanyi, ne witabuuja Ewu udi muNtùme, ùdi ne Mwoyi wà kashidi; ne kààkupicila ku dipiishiiibwa to, kàdi mmumùke ku lufù muyè ku Mwoyi.” Kî mbwalu udi mupete dinyungishiibwa kampàndà, disaluka kampàndà to, kàdi mbwalu wèwè udi, ne dyèsè dyà kwikala ne Kilistò udi mukubuulwile ku Dyulu: “Pa lubwebwe elu Nèngiibakilèpu Èkèleeziyà Wanyì.”

35 Ne pashiishe, Yakòbò, pàakafwàye, mwanèndè wa balùme wàkambwisha mubidi wèndè, ne yéyè wàkajiikiibwa mwaba wùm wè ne Abraham, Izàkà, Sarah, ne Yobò, mu Malaba a Cijila, mu Pàlèstinà.

36 Pashiishe, Yözefù, mwikàle mupròfeta. Wàkatanta mu Èjiiipitù. Ùvwa mumanyè Nzambi. Nzambi wàkaDibuulula kùdiye. Nènku pàakafwàye, wàkamba ne: “Kanùjiiki mifùbà yànyì muneemu to, kàdi nùteekè... piikalà... Ncyà bushùwà ne dîngà ditùkù Nzambi neànùm wènekèlè!” Bwà cinyi? Ùvwa mushàale mwimànyine kakùyì tuseku to pa Dîyì dyàkambila Nzambi Mòsà ne: “Bidimu nkàmà yinaayi bòbò nebakwacilè ditungà edì mudimu, kàdi Mémè nèmbàpàtùlè.” Yéyè ùvwa mushàale mwimànyine kakùyì tuseku to pa Dîyì adi.

37 Nènku ncimfwànyikijilu kaayi bulengaci kaaba aka bu nwènù mwà kumòna. Mwena Ebelù yònsò uvwa upicilakù, ne nyimà mutuuta mfimbù muuja, kùdì tupità twà bapika. Ne pàvwàye ùkùpa dîsù ku mifùbà yà mupròfeta wèndè awu, Yözefù, ùvwa ùmanya ne dîngà ditùkù bàvwa ne cyà kupàtuka. Bwalu, mifùbà ayi yàkashàalakù bu civùlukilu kampàndà cyà ne, dîngà ditùkù bàvwa mwà kupàtuka.

38 Kùkaadi bidimu bitwè ku dikùmi ne bitaanu anyi dikùmi ne mwandamukùlù pàvwà Billy Paul, mucìkàle mwànà mukesè wa bidimu bitwè ku bitaanu, byàmba kwikàla bùngì abu... Tuvwa ne kaacilòngò kakesè katùvwà tuya naakù ku lukità lwà mamwèndè, ku dipàtuka dyà dîbà mu dîndà kampànda, dyà Paasàkà, ànu pàvwà dîbà dipàtuka, dipàtula patòòke apu; anyi pawìpì ne kwìsù kutòòkakù apu, mùvwàbì, pashiishe tuya mu disangisha. Nènku patùvwà twenda tupweka ku lukita apu, kakwàcikwètù aku kutùulakù cifulu patùkaavwà tusemena pàvwà mwakùnyèndè wa bakàjì ne mamwèndè bajiiikiibwe apu. Ki kubangayè kushinkunkila ne kwasa mwadi, kwambaye ne: “Papa, maman udi mwînshì mu ciina mwàmwa anyi?”

39 Mémè ne: “To, mwanàanyi. Kèna mwînshì mu ciina mwàmwa to. Ùdi mu ngiikàdìlù mwîmpè misangu mùliyò mujimà kutùtamba twètù neebè.”

Yéyè ne: “Ngaadyàkumònakù maman cyàkàbìdì anyi?”

40 Mémè ne: “Ku ngàsà wa Nzambi, wèwè ujinga nanku, udi mwà kumumòna cyàkàbìdì.”

Yéyè ne: “Mubidi wèndè newùpatukè mu lukità emu anyi?”

41 Mémè ne: “Munanga wanyì, bwità kwìsù, kàdi nkulondèlèku kaabwalu kakesè. Kùkaadi bidimu nkàmà yàbùngì, mu dîndà dyà bwena edì, kùvwa lukità kampàndà lwàkashàalà munda mutupù.” Mémè ne: “Ncivùlukilu cyà ne ‘aba bàdì balàale tulù mu Nzambi abu Kilistò nealwe naabò pàm wè Nèndè pàalwàYe.’” Kakùyì mpatà nànsha mikesè to, mémè ndi mwimànyine pà mulayi wa Cyendèlèlè wà Nzambi!

42 Bu Yòbò wa kale awu, patùdì tuumvwa ne “butù ku butù, ne lupwishi ku lupwishi,” cìdi cìmvùlwija Longfellow, wâkamba ne:

Kùngambidìku, ne myâkù yà mwadi ne,
Mwoyi wùdi ànu cilòòtà cyà munda mutupù!
Ne musùùkà wùdi mulààle tulù mmufwe,
Ne bintu kabyèna mùdìbi bìmweka amu to.

Kwambayè ne:

Èyowà, mwoyi ngwà cyà bushùwà! Mwoyi
nceyeyà!
Ne lukità kî nkiipàcìlà kààwù to;
Bwalu udi lupwishi, newàlukilè ku lupwishi,
Kacyàkambiibwa bwà musùùkà to.

43 Bàdi bàcìbìikila ne n'tèòfanì, ne pàtùdì tuumuka pànwapa tuyaya kabwela mu mwaba kampànda mukwàbò. Nànsha cìikàle cinganyì, mèmè ndi ngangata Díyì dyà mùpostòlò, pààkambàye ne: “Pìikalà nntentà wa pa buloba ewu anyi mwaba wà cisòmbedi ewu munyangùke, tukaàdì ne mukwàbò mwindìle, bwà kuumuka mu *ewu* kukabwela mu Wówò awu.”

44 Abraham, Izàkà, Yakòbò, Yobò, bapròfetà bônso abu, bààkeeyemena ne bààkiitabuuja ne kùvwa kùlwa dibìikà dyà ku lufù, bwà ne Mupikudi ùvwa ùlwa. Bààkamba cipròfetà Bwèndè Yèyè. Henòkà wâkamba cipròfetà Bwèndè Yèyè; mwimànyìnepu kakùyi tuseku, kucitwayè citampì ne bujaadiki bwèndè. Izàkà, Yakòbò, Danyèlè, Yelèmiyà, Yèhezèkèlè, bààkashààla biimànyìne kakùyi tuseku to pa cikondo cìvwa Maasiyà ne cyà kulwa.

45 Ne bôbò bààkafwà ne misùùkà yàbò yàkabwela mu Mpàlàdiizò. Kabàvwa mwà kubwela mu Bwikadi bwà Nzambi to, bwalu (tuvwa bacyàmbè makèlèlèlè dilòòlò awu) bwalu mashi a bimpàngà byà ngombe ne a mbùji kaàvwakù mwà kujìmija mpèkaatù to; àvwa ànu àbwikila mpèkaatù, miikàle àakula bwà ditùkù dyà Mulàmbù mupwàngàne; bwalu mashi àdi mu nyama kaàvwa mwà kwalukila pa mukuukwidi to, bwà cyanààna yèyè kàvw'a kwikala mulekèle kulàmbula milàmbù yà mùshindù awu to.

46 Kàdi pààkafwà Mwànà wa Nzambi, Mwoyi wùvwa munda Mwèndè awu kawùvwa cingà cintu to ànu Nzambi, bwà kwalukila ne kutùtèeka mu dìkù dyà Nzambi. Nènku mpindyewu tudi bânà bàà Nzambi, Mwoyi wà mu Mashi Èndè.

47 Mpindyewu mōnaayi ne lùkàsà lwónsò, patùdì twenda tulonda apa. Kale wàwa mu Dipungila Dikùlukulu, ne aba bààkiitabuuja ne bààkakuukwilà, ne bààkafwà mu Diitabuuja, bindìle cikondo aci abu, cyakenzèjà bapròfetà abu nanku, ne bàjinga bwà kujìikiibwabò mu Pàlèstinà ncyà ne, bàvwa bamanyè ne dibìikà dyà ku lufù kadìvwa mwà kwenzekela mu Èjiipitù to. Dìvwa ne cyà kwenzekela mu Pàlèstinà, ànu mwómò nkayaamu.

48 Ki bwà cinyi ndi ngamba dilòlò edì ne: Mbantwè mènà a mishindu yònsò; mènà àdì bantu bántwà kaèna ne cidiwu àngenzela to, kabyèna ne cidìbì bingambila to nànsha kakesè. Cintu cimwèpèlè cìndi muswè kwenza, ncyà kumanya ne: ndi mufwè, ne mwoyi wànyì mmusokoka mu Kilistò, mu Nzambì, ne mutwà citampì kùdì Nyumà Mwímpè; bwà ne pààbìikilàYe munkaci mwà bafwè, nēngiitabè ditùkù adi. Nūnjiikè mu Kilistò, bwalu aba bàdì mu Kilistò Nzambì neàlwe naabò pāmwè Nendè mu ditùkù adi.

49 Tudi tubwela mu Kilistò bishì? Kolintò wa Kumpàla 12.13: “Ku Nyumà umwe nkutùdì bònsò babàtìijìibwe mu Mubidi wumwepèlè, ne balwè beena mwàbò bàà Bukalenge bwà Nzambi.” Tudi tujikula twamba ne tudi beenyi ne beena lwendu pa buloba ebu, katùciyi kàbidì, twenda tukèbangana ne bintu byà pa buloba ebi to, kàdì bindile dilwa dya Mfùmù mubèneshiibwe awu bwà kwangata buloba bònsò ebu ku bukòòkeshi, kuumukila ku mbù too ne ku mbù wa kàyi mfùdilu, pààlwàYe mu butùmbi Bwendè. Cyà bushùwà ne, tudi bindile Dilwa Dyèndè.

50 Ne dîbà adi kakwena mpatà mu meeji àànyì to, bwa ne ki cìvwà naaci Yesu mu meeji Èndè pàvwàYe pànu pa buloba, cìvwa ndibènga-kupangila dya Dìyì dya Cyendèlèlèlè dya Nzambì adi. Bwalu, tudi bamanyè ne mu Yèyè mùvwa musòmbèle kaabujimà kàà Bunzambi mu mùshindù wà Mubidi. Bunzambi mu kaabujimà bùvwa munda Mwèndè. Ûvwa byònsò Taatù, Mwànà, ne Nyumà Mwímpè, kàdì musòmbèle mu mmwènekelu wa buntu; tèòfànì wa Nzambì, cimfwànyì cinènè cyà Nzambì cyàkenzàYemù muntu aci, pashìishe kumutèeka pa buloba. Yèyè ùvwa ne mubidi. Nzambì kàtu mupangè mubidi to. Nzambì ùtu ne mubidi, ne wòwò awu mmufwànàngàne ne muntu. Mòsà wàkawùmòna, bakwàbò bààkawùmòna, ne mmufwànàngàne ne muntu.

51 Kàdì udi ànu mmwènekelu pàtupù, ewu ewu, wà cidi Wòwò awu. Nenkù bintu byònsò pa buloba, bulenga bwà kwìsù, kalolo, bulenga bwà buloba, kabyèna cìngà cintu to ànu dyandamuna dya cintu citàmbe bwímpè, cìdì citwìndìle patùdì tushiyangana ne buloba ebu. Bwalu, cintu cyònsò pa buloba cidi ànu citembelu cyà cidi mu Dyulu. Cintu cyònsò cìmpè, cintu cyònsò cyakàne, cintu cyònsò cidi cilenga, micì, nyuunyi, byònsò, bìdì ànu citembelu cyà bìdì mu Dyulu.

52 Mwoyi wètù twètù mwine’s wùdì ànu ncitembelu cyanàànà. Cidi ànu mundìdimbì cyanàànà, kàdì kí ncintu cilelèlè to. Nduseke lwà ciibùlòjì. Bidi bikèngela lufù bwà kusukula fòtò, bwà kutwàluja mu tèòfànì mutùdì bafùmìne. Dîbà adi mu dibìikà dya ku lufù tudi tulwa mu difwànangana Nendè, mubidi mubiishìibwe ku lufù. Bulenga kaayi’s wè; kaciyi ànu cilenga to, kàdì m’Bulelèlèlè bwà cyà bushùwà, bwà kakùyì tuseku to

bwà Dìyì dyà Cyendèlèlèlè dyà Nzambi, bwà ne twètù netwikalè bafwànàngàne Nendè.

⁵³ Mònaayi mpindyewu, Yesù, muvwàdikùibwe ne makolè ònsò a Nzambi, kàdi, pàakatwilanganàYe ne Sàtaanà, Yèyè kààkakwàtakù mudimu nànsha ne bùmwe bwà ku makolè Èndè awu to. Wàkaleedila ànu ku Dìyì! S'ki cyàkenzàYe. Wàkamba ne: “Bààkafùnda ne: ‘Muntu kààkwikala ne mwoyi ànu ku dyàmpà nkààyaadi to, kàdi nku Dìyì dyònsò dyàkapàtukà mukana mwà Nzambi.’”

⁵⁴ Dìbà adi mmunyi mùdi mwà kwamba ne udi mwà kushààl kumbèlu kàdi kwikala ànu mwena Kilistò mwìmpè mùdi mufwànyine kwikala mu èkèleeziyà? Kwèna mwà kwikalakù nàнку to. Balà Dìyì! Nyumà Mwìmpè ùdi ùdya Dìyì. Bible ki cyàkudyà cyà nyumà cyà bwàcyàbwàcyà cyà Nzambi bwà Èkèleeziyà Wendè. Ne Nyumà Mwìmpè ki Ewu Udi ukutwàdilaDì ne ùDishikika mu mwoyi, ne wèwè uDìmyamina ne màyi a disàkidila. Ne mulayi wònsò wà Nzambi newùtwalè ànu menemene cìdi Nzambi mwambè ne newènzè aci. Ki cìdici ne cyà kwenza. N'Dìyì Dyèndè, ne Dìdì Mwoyi.

⁵⁵ Mpindyewu, nkààvwa mupwè ne mwoyi ne mvwa ne cyà kwangata ànu citùpà cyà dìbà. Bìdi bingangata ntàntà mule be bwà mèmè kufika ku cìndi njinga kwamba.

⁵⁶ Kàdi mònaayi ne Yesù mu dìbà dyà ndekeelu, anyi àbìdì, à mwoyi Wèndè, bipròfetà byàbùngi, bùngi cyanààna byàkuula.

⁵⁷ Muntu kampàndà wàkangambila ne: “Mwanètù Branham, bikèngela bwà *cikampàndà* cyènzekè, ne bikèngela bwà *cikansanga* cyènzekè.”

Mèmè ne: “S'mbifwànyine kwenzeka mu dìbà dimwè.”

⁵⁸ Bu nwènù mwà kubala Musambu wà 22, ne pashiishe kutàngila dìbà dyà lufù Lwèndè ku nkùrusè aku, nyewù ngápù ne mwoyi mpindyewu bùngi bwinè bwà bipròfetà byàkuujiibwà mu mèba àbìdì anyi àsàtù a ndekeelu a mwoyi Wèndè's! Cyà bushùwà: “Bátùbulu makàsà Aanyi ne byanza Byanyi. Nzambi Wanyi, Nzambi Wanyi, WàNdekèdì bwà cinyi?” ne bikwàbò, bu mwàkadilà Davidi amu.

⁵⁹ Ne pashiishe cikwàbò cintu cìndi njinga bwà nwènù kumòna, Bulelèlè, luseke lwà Dìyì dyà Nzambi lùdi kalùyì mwà kupangila alu. Bible mmwambè ne: “Yèyè mmulamè mifùbà Yèndè yònsò, nànsha wùmwe wà ku yòyi kí mmucibùdiibwe to.” Bwalu mu cifwànyikijilu, mwànà wa mùkòòkò wa paasàkà awi ki uvwa cifwànyikijilu cyàcì's. Mwànà wa mùkòòkò awu uvwa ne cyà kwikala kàyi kalèmà, kakùvwa ne cyà kwikala mufùbà mucibùke nànsha wùmwe mu mwànà wa mùkòòkò awu to. Ne pa dìbà dìvwàYe. . . dyàkafwàYe, bààkaya bwà kucibula mikòlò Yèndè ne nyindu. Kàdi ànu kumpàlà kwà. . . Tàngilàayi mu cikondo cyà bwalu butondè aci! Muntu uvwa ne nyindu awu, ùkaavwa ne àtuutè mu mikòlò Yèndè, kàdi Dìyì dyà Nzambi

dikaavwa dyambè ne: “Kakwàkwikala mufùbà nànsha wùmwe mucibùdiiibwe mu mubidi Wèndè to.”

“Mmunyi mwènzekàci’s?” Twetu tudi tulwijakaja malu.

⁶⁰ Dìyi dyà Nzambi ndya Cyendèlèlè! Piikalà Dìyi dyà Nzambi dipwàngane mùshindù awu, aba bàdi mu Kelistò’s mbatwishiiibwe ne nebàbiikè ku lufù ànu mùdiku dibiikà dyà ku lufù. Nzambi mmuswìkiiibwe ku Dìyi Dyèndè, bwà kukwondopa, ànu mùdiYe muswìkiiibwe bwà kukusungila. Bwalu, Yèyè, Dìyi Dyèndè ndidi dicilayè. N’Dìyi dyà Nzambi, ne katwèna ne bukenji bwà kuumushilaKù kantu to. Kàdi ambà wèwè ànu ne: “M’Bulelèlà.” Dìtábùùjè! Nànsha cinyi cyenzèke, Dìtábùùjè, nànsha bishi. Mùshindù awu ki wàkakèngelàbi ne bakwàbò abo bàDìtábùùjè, ne twètù katwèna buumùshiiibwe ku aci to. Nzambi wàkapèèsha Izalèlèlè Pàlèstinà, kàdi byàkakèngela bwà bóbò kulwanganana mvità bwà katùpà ne katùpà kònsò kàà buloba kààkapetàbo aku. Mulayi ng’wèbè wèwè, kàdi bikèngela ùlwanganè bwà katùpà kònsò kaùdi unana aku; dyabulù neàcitàbàlèlèlè, ncyà bushùwà ne ki cyènzàye.

⁶¹ Kàdi mònayyi ne pàkaavwàbo badilongòlòle bwà kucibula mikòlò yà Mukalenge wetù Yesù, bu ne nyindu awu wàkatuuta mu mukòlò ne kuwùcibula, nùnkù Nzambi’s mmuvwijiiibwe mwena mafi. Kàdi kakùvwa baadémons bùngi bukùmbàne mu mwaba wònsò wà dikèngeshiiibwa wà midimà awu to bwà kulekela nyindu awu ùtuuta mubidi wà musinga mukolè awu. Bwalu Davidi, bidimu nkàmà mwandamukùlù kumpàlà, wàkamba ne: “Kakwàkwikala mufùbà nànsha wùmwe mucibùdiiibwe mu mubidi Wèndè to.” Dìyi dyà Nzambi Didi ne cyà kushààla Bulelèlèlè.

⁶² Kàdi cyàkenzàbo ncinyi dībà adi? Bààkangata difumà e kudicimpikabò mu lubadi Lwèndè, ki mashi ne màyi kupàtukabi, bwà kuuja cyàkambà Bible ne: “Bātùbulu byanza Byànyi ne lubadi Lwànyi.” Dìyi adi dyàkuula.

⁶³ Mpindyewu pàvwàYe ùpunga ne lufù, kaa, dībà kaayi dyà dikwacisha bwòwà’s wè! Ndi mvùluka musambu awu, kàdi, ne meeji matòòkè ònsò, wùdi ànu wenza ne ndyùmvwa bibi be, pàndi mvùluka musambu wàkafùndà mwedi wa kasàlà awu kùkaadi bidimu byàbùngi.

Munkaci mwà mbwebwe yìtaayika ne mauu
àfiika,
Musùngidi wanyi kwinyikaYè mutù paanshi ne
kufwàYe;
Cilàmbà-cikùdika cikàngùke aci e
kusokololaci njila
Wa ku masankà à mu Dyulu ne ditùkù dyà
kadiyi ndekeelu.

⁶⁴ Nènku pàvwàYe mukùdika kuntwaku apu, ùzònta mashi ne ùpunga ne lufù, pààkiinyikàYe mutu paanshi, dībà dyà

muulu kudyùmvwadi bundu bwàbùngí, bwà kutàngila panshi pa bifùkùibwà byà cifwàkà bivwà Nzambi mwenzè mu cimfwànyì Cyèndè, bifwànyine kukèngela bwà kufuta mushinga bu awu bwà kubìpikula, díbà kubèngadi bwà kutàngila panshi pa buloba mu diinè díbà adi. Ngondo wàkadyùmvwa mufwìshìibwe bundù mu mùshindù wà ne wàkadikòka e kuumuka ne kaaba kèndè. Ne mìtootò yàkakoma buloba nyimà. Cintu cibi kaayipu cidi mpèkaatù ne cyà kwikala's wè! Mùshindù mwìnè wàkakèngelàbi bwà Nzambi kukùngamangana naaci's wè!

⁶⁵ Ne pa kumòna baakwidi bàvwà bàseka abu, eku mwikàle ne matè àMupwekela kwìsù. Muntu kampàndà kuMutuutayè ku mutù, ne dilengè, wàmba ne: “Wèwè ní udi Mupròfetà, twàmblèbi wàKutuutù awu ne nganyi.” Umwe wa kùdìbo kuMutùulayè mwedi, kàdi kuMunàngula dipi mwìsù, ne kuswàye bwà Yèyè àDyàkwilè.

⁶⁶ Yèyè ne: “Bu ne Bukalenge Bwànyì bùvwa bwà buloba ebu, Mvwa mufwànyine kubiikila Taatù Wanyi mpindyewu mene, Yèyè ùvwa mwà kuNtùmina Banjèlo bisumbù binènè diikùmi ne bibidì.”

⁶⁷ Nùнку maalu's mmashintùlùke, kàdi Ùvwa mufwànyine kucyènza munyi? Kàvwa ànu mufwànyine kucyènza to, bwalu bàvwa mbànà Bèndè sungasunga bèèla mbilà balòmba Mashi Èndè. Nudikù mwà kudifwànyikijila papa, taatù, ne bânà bèndè sungasunga (mu mìdimà) bèèlà mbilà bâlòmba mashi à tatwabò muledi anyi? Ki bwà cinyi Yèyè kàvwakù mwà kwenza cingà cintu to ànu kufwà. Bu Kayi mwenzè nàнку to, civwa nkabùtù bwà bânà Bèndè, civwa nkabùtù bwà bifùkùibwà. Kàdi bivwa bikèngela ànu Àfwe, bwà kusùngila cisàmbà Cyèndè.

⁶⁸ Nèнку pààkafwàYe, pààkinyikàYe mutù Wèndè panshi, buloba bukùlākājì ebu bwàkapeta muzakalu mu mwongo. Bùvwa ne cyà kwikala bupetè mateketa makolè, bwalu Bible mmwambè ne “buloba bujimà, kuumukila ku díbà diisambòmbò too ne ku dyà citèèmà, kwàkadi mìdimà, yìvwa pa buloba bujimà.” Ne buloba bwàkazakala, ne mbwebwe yàkapandika. Ne cilàmbà-cikùdika cyà mu ntempèlù cyàkapandika kuumukila kuulu too ne kwìnshì; mabwè a ku cyòshelu cyà milàmbù àkatònkoka. Mwànà wa Nzambi udi ne mwoyi wàkafwà. Ùvwa mufwè mu mùshindù wà ne díbà dyàkacijingulula. Ùvwa mufwè mu mùshindù wà ne ngondo wàkacijingulula. Ùvwa mufwè mene mu mùshindù wà ne mìtootò yàkacijingulula. Ùvwa mufwè mu mùshindù wà ne buloba bwàkacijingulula. Ùvwa mufwè mu mùshindù wà ne bukwbàbintu bwàkacijingulula, bibwàshìbwàshì byàkacijingulula. Bintu byònsò bivwa ne cyà kumanya ne ùvwa m'Wànà wa Nzambi! Bwalu, Dìyì dyà Nzambi kàdivwa mwà kupangilaku to, Yèyè ùvwa mulayìibwe, kuumukila ku budimi bwà Edènà: “Dimiinu divwà mwà kuzaaza mutù wa nyòka adi.”

69 Mpindyewu cyàkaMwenzekelà ncinyi? Wàkaya penyi pààkuumukàYe ku nkùrusè ne kubwelaYe mu lukitá lwà Yòzefù wa ku Alimàtà apu?

70 Yèyè ùvwa mupèlè wa dikèma mu mùshindù wà ne Kàvwa ne mwaba wà kutèekaYè mutù to. Wàkalediibwa mu cidiilù cyà nyama, ne dína dibì dyènda dìMulonda, dyà ne “mwànà mulela mu masandi.” Wàkasekiibwa, kwelulwidiibwa, kupwekeshiibwa milongo, pa buloba apa. Wàkeelulwidiibwa, ne kubèngiibwa. Ne pààkafwàYe, Byàkakèngela bwà kufwàYe ku dinyooka dyà lufù, pankaci pàà bìvi bàbidì. Ne kàvwa nànsha ne mwaba wà kuMujiiikabò to, nènku Wàkajiiikiibwa mu lukitá lwà muntu mukwàbò. Nzambì mwinè wa mu Dyulu ùlwa pa buloba! Twètù aba tudi twela meeji ne tudi banganyi, pàdibi bìkèngela bwà twètù kupicila mu kaalutàtù kakesè cyanànà? CyàkatwènzèlèYe aci's! Èlàngànàku meeji pa bwalu abu, wèwè mulundà wanyi, cilongèbi tǔng.

71 Disàlaayi dyà beena Loomò adi kwambadi ne: “Bulelèlà, m'Mwànà wa Nzambi.” Ngènzàmpèèkààtù ùvwa ne cyà kuciingulula. Yudààsà kwambayè ne: “Ndi mutungile Mashi àdi kaayi menzè bwalu.” Ùvwa ne cyà kuciingulula. Buloba bujimà bwàkaciingulula.

72 Pashiishe kwàkayàYe mpenyi? Pàdi muntu ùfwa, aci ki ndekeelu wa bwalu anyi? To, mukalenge. Yèyè ùvwa ne cyà kufwà mùshindù awu bwalu Bible wa Nzambì mmwambè ne Ùvwa ne cyà kufwà mùshindù awu. Ne Yèyè ùvwa mweyèmène Díyi dyà Nzambì. Ki bwà cinyi Ùvwa mwà kwamba, pàvwàYe ne mwoyi apu ne: “Shimbùlaayi ntempèlù ewu, ne Mémè nèmmujuulè mu matùkù àsàtù.”

73 Bwalu Davidi wàkamba, mu mwaba kampàndà, ùmwèpele, mu Bible emu, mwikàle musonsola, pàvwà Davidi, muntu wa Nzambì, mupròfetà uvwa mulaabiibwe ne maanyi a Díyi awu, mwambè ne: “Ncyàkwitabakù bwà Wa Cijila Wanyi àmonè dibola, anyi Ncyàkulekelakù musùukà Wèndè mu ifernò nànsha.”

74 Yesù wàkamba ne: “Nwènù shimbùlaayi mubidi ewu, ne Mémè nèngùjuulè mu matùkù àsàtù.” Ùvwa mumanyè ne Díyi dyà Nzambì kadivwa mwà kupangila to. Kaa, ekèlèkèlè!

75 Piikalàbi ne Ùvwa mwà kushààla kakùyì tuseku to mwimànyìne pa cyòci aci, mwitàbùùje ne Díyi dyà Nzambì kadivwa mwà kupangila, ambààyaaku tǔng mutwàbèngà kushààla biimànyìne kakùyì tuseku pa ne tudi balediibwe cyàkàbidì ku Nyumà Mwimpè, ne Yèyè mwikàle bujaadiki mu mwoyi wètù mpindyewu mene ne tudi bamanyè ne Mupikudi wetù ùdi ne mwoyi ne neàlwe cyàkàbidì ditùkù kampàndà. Shààlaayi ne mwoyi mutùùje ne aba bàdi mu Kilstò Nzambì neàlwe naabò pàmwè Nèndè! Mpindyewu mònaayi.

⁷⁶ Ki Yèyè awu's. Úvwá mumanýè ne kabùlù kàà mashi nànsha kàmwè kàà mubidi awu kakàvwakù mwà kunyanguka to. Mu mèbà makùmi mwandamutekète ne àbìdì, dibola dítu dibanga. Ki bwà cinýi Yèyè kààkashàalakù matùkù àsàtù to. Wàkafwà mu diitànù mu mapingaja, ne kubiika mu dindà dyà dyàlumingu. Kàdi, mùvwá mmunda mwà matùkù àsàtù awu. Munda mwà matùkù àsàtù awu Yèyè úvwá ne cyà kujúuka cyàkàbìdì, bwalu Úvwá mweyèmène Dìyì dyà Nzambì.

⁷⁷ Ki Yèyè uyààya ewu! Mpenýi pààkuumukàYe pààkuumukàYè apu? Bible mmwambè ne: “Wakabànda. Wàkaya kayiisha misùukà yìvwà mu bùlokò, yàkabèngà kunyingalala mu lutùùlù lwà mu matùkù a Noà ayi.” Musùukà Wèndè, Nyumà Wende, tèfànì Wende wa buumùntù Bwendè Sungasunga, wàkapweka. Twánjàayi kuMulonda. Nudikù baswè, dilòòlò edi, kwanji kuMulonda bwà katanci kakesè anyi? Twánjàayi kumòna kwàkayàYè.

⁷⁸ Ànu mwinshì mwà myaba yìdì bantu bàà cifwàkà basòmbèle eyi mùdì mùsanganyibwa cipaapu cyà bukolè bwà dyabùlù; mwinshì mwà aci . . . ànu kumutù kwà cyòci aci kùdì misùukà yà babì; mwinshì mwàci amu ki mùdì cipaapu cya Sàtaanà, ifernò. Pashiishe ànu kumutù kwètù nkùdì Nyumà Mwimpè; pashiishe mwinshì mwà Cyoshelu mùdì misùukà yà bantu baakàne; udi ulonda ki Nzambì Yèyè mwinè. Ewu ùya mupwekè, ewu ùya mubànde; nyumà yìbìdì ayi yìdì pa buloba apa, yìfla bwenzeji pa bantu bàà pa buloba ebu.

⁷⁹ Nènku pààkafwa Yesù, Wàkaya, kupwekamù. Ndi mwà kuMumòna mu diitànù amu mu mapingaja, paanyimà pàà lufù Lwèndè, [Mwanèètù Branham ùdì ùtuuta bintu pa cyambilu—Muf.] ùkookola ku ciibi cyà myaba yà bajimìne. Twánjàayi kuMulonda kakesè. Ciibi cidì cyùnzuluka. Mùvwá bakàjì, mùvwá balùme, mùvwá bansongàakàjì, mùvwá bakùlákàjì, bàvwá bònsò pàmwè mu mwaba wà wènta bwòwà pa kuwùmòna wùdìbo bàbìikila ne mbùlokò bwà misùukà mijimìne awu.

⁸⁰ Bu mèmè ne dìbà, mvwà mwà kunùlondela. Kàdi ncifwànyine kwikala ànu cikèenà-kumòna cyanàànà. Kàdi musangu kampànda ngàkaya mu mwaba awu, ne kwela mbilà mikolè ndòmba luse, pàncìvwà ngènzàmpèkààtu biikàle munkaci mwa kumpanda. Pàngààkapàtukàmu, mvwá mwimàne mu Wesètè, ne byanza byela muulu bitàngija mu Dyulu, ne nkùrusè ùngeela nsèsè pambidi.

⁸¹ Kàdi mu mwaba wà dibungama awu, Yesù wàkaya ku ciibi. Bintu byònsò bìvwá ne cyà kujaadika ne Yèyè úvwá Mwànà wa Nzambì, bwalu bòbò bààkayishiibwa mu lutùùlù lwà mu matùkù à Noà. Kukookola ku ciibi, Yèyè kwamba ne: “Mèmè ki Yèyè Wàkambabò kùdì Henòkà awu. Mèmè ki Dimiinu dyà mukàjì, divwà ne cyà kuzaaza mutù wà nyòka adi. Dìyì

dyònsò dyà Nzambì ndyùle; Ndi mfùma ku difwà ku Kàlvaryò kwàka, ne Ngàsumbu Èkéleeziyà Wanyì. Ne Yèyè wàkambabò kùdi Henòkà awu, Mémè ki Yèyè awu.” Ne bàvwa bapangile luse, kabàyi ditèkemena, bwalu bàvwa bashìpe mikenji. Ki kubàkàngilabò ciibi mwìsù.

⁸² Yèyè kupweka e kubwela mu myaba yà baadémons! Yèyè kupweka e kuya ku biibi mene byà ifernò! Ùdi ùkookola ku ciibi. [Mwanèètù Branham ùdi ùtuuta bintu pa cyambilu—Muf.]

⁸³ Eci mpàvwàYe mu lukità apu, mubidi Wèndè awu’s, mwindile dìbiikà dyà ku lufù. Wàkaya mu myaba yitù baakàne ne babì bàya; munwàyà òmwè dyà ku matùku àdi panshì aa, ku wùmwè anyì mukwàbò wà ku myaba eyi.

⁸⁴ Ki Yèyè kukookola ku ciibi cyà ifernò. [Mwanèètù Branham ùdi ùtuuta bintu pa cyambilu—Muf.] Nènku, pààkakookolàYe, dyabùlù kupàtukayè. Nènku ndi ànu mwà kumuumvwa wàmba ne: “Kaa, ndekeelu wa byònsò s’ki Wèwè wàfikì ewu. Cyà bushùwà mvwa ndyàmbedila ne mvwa muKupetè pàngàakashipà Abèlè apu.”

⁸⁵ Nudi numòna’s, pààkalayibwà Dimiinu adi mu budimi bwà Edènà, dyabùlù ùtu muteetètèète díbà dyònsò ànu bwà kushipa Dimiinu adi. Nènku lufù lwà Abèlè alu, ne dilwa dyà Setè, cìvwa ànu lufù, dijiikiibwa, ne dibìikà dyà ku lufù dyà Kilistò. Dimiinu adi dìvwa ne cyà kutùngunuka. Nènku ùvwa ùteeta bwà kuDibùtula.

⁸⁶ Kwambayè ne: “Mvwa ndyàmbedila ne mvwa muKupetè pàngàakashipà Abèlè apu. Mvwa ndyàmbedila ne mvwa muKupetè pàngàakashipà baprófeta apu. Mvwa mutwishìibwe ne mvwa muKupetè pàngàakakòsa Yone mutù apu. Kàdi mpindyewu, ndekeelu wa byònsò, ki Wèwè wàfikì ewu. Ngàakupeci mpindyewu.” Kaa, ekèlèkèlè!

⁸⁷ Ndi mwà kuMuumvwa wàmba ne: “Sàtaanà, lwà mwab’ewu!” Yèyè ki Sheefù mpindyewu. Wòlola cyanza, ùnyènga nsapì yà lufù ne yà ifernò yìvwa ku luseke lwèndè alu ayì, ùyìkùdika ku luseke Lwèndè Yèyè mwinè. “Ndi muswè bwà ùfundè ùlamè eci. Udi mwenzè mikaaka ntàntà bule bukùmbàne. Mémè ndi Mwànà wa Nzambì udi ne mwoyi mulela kùdi virgò. Mashi Aànyì àcìdi ànu mabishi pa nkùrusè, ne dibànza dyònsò nkòòng ndimana kufuta! Kùcyenà kàbìdi ne bukenji to. Udi mupòòpòdiibwe. Mpèèshè nsapì ayì!” Ncyà bushùwà. Ùkùdimuka kàdi kumutwà musèbè wèbè wà makàndà awu’s, kàdi kutuuta ciibi, kwamba ne: “Shààla munda amu! Mémè ki Sheefù kubangila ku mpindyewu.”

⁸⁸ Mpindyewu, Yèyè kàvwa ne nsapì yà Bukalenge to, bwalu Wàkayipèèsha Peetèlò; netùmonè cyònsò aci mu dindà, mu dibàtiiza dyà mu màyi. Kàdi yèyè nguvwa ne nsapì yà lufù ne yà ifernò, ki kuyàngataYe; paanyimà pàà dibìikà Dyèndè dyà ku lufù, Yèyè wàkamba ne: “Mémè ndi ne nsapì yà lufù ne yà ifernò.”

Peetèlò nguvwa ne nsapì yà Bukalenge. Sàtaanà nguvwa ne nsapì yà lufù ne yà ifernò; kàdi mpindyewu Yesù ngudi naayi, Yèyè ki Sheefù.

⁸⁹ Ki Yèyè udi ubanga kubànda ewu. Tukaadi twipacila Paasàkà; díbà diyaaya lubilu lukolè. Kàdi nyewù kùdi musùmbà mukwàbò. Yobò wèpi? Abraham wèpi? Bàdi penyi? Bantu bàvwà beeyèmène Dìyi dyà Nzambì abu bàdi penyi? Ùkaadi mubàpwe mwoyi anyi? Lufù lùkaadi lubàbùtùle bütübütù anyi? Kwàbò kwàkamana kujika anyi? Nànsha kakesè, nànsha kakesè; Nzambì ùdi ne cyà kushààla mukwàte ku Dìyi Dyèndè.

⁹⁰ Ndi mwà kuMumòna. Twànjàayi kutàpa dísu mu Mpàlàdiizò, bwà tütàngilèmu tüng. Nènku ndi mmòna Sarah ne Abraham bènda bèndakanamù, ne paanyimà pàa katançi [Mwanèètù Branham ùdi ùtuuta—Muf.] cintu kampànda ku ciibi. Abraham ùdi ùya ùkangula ciibi, wàmba ne: “Munanga wanyi, lwà kùnu. Tàngilà kùneeku! Tàngila kùneeku, s’n’Yèyè umwèumwè uvwa mwimàne naanyi mwinshì mwà mucì wà nsànga ditùkù adi awu.” Yèyè n’Nzambì wa Abraham.

⁹¹ Ànu díbà adi ndi mwà kumòna Dànyèlè ùpongwela pa dikaaya dyèndè apu, wàmba ne: “S’ki Dibwe dyàkakòshiihwà ku mukùnà adi, bushùwà menemene ànu mùndì mwimàne kaaba aka emu’s.”

⁹² Ndi mmòna Yobò ùjuukila kuulu, wàmba ne: “Ki Mupikudi wanyi ungàakambà ne mvwa mumanyè ne ùdi ne mwoyi awu, ne díngà ditùkù Ùvwa mwa kwimana pa buloba. Mubidi wànyi udi mwà kwikala mushààlè ànu nkutu mukesè wa butù, kàdi mu tusunsa dikùmi ne tùtaanu kubangila ku mpindyewu nèngìkalèmu cyàkàbidi. Ki Yèyè awu.”

⁹³ Yèhezèkèlè kutàngidilayè lwà pamutù apu, e kwambayè ne: “Ngàkamona Muntu umwèumwè awu bu Lukàtà munkaci mwà Lukàtà, lùnyùnguluka, muulu mutùmbùka munkaci mwà lupeepèle.” Kaa, ekèlekèle!

⁹⁴ Pashìishe ki Henòkà udi useemena ewu. Henòkà kwambayè ne: “NgàkaMumòna ùlwa ne binunu dikùmi byà bansantu Bèndè, bwà kwenza dilumbulwisha.”

⁹⁵ Ki kùvwa bansantu bàà Dipungila Dikùlukulu bindile, ncyà bushùwà ne bàvwà bindile, mwinshì mwà difuta dyà cibawu dyà mashi. Kabàvwà mwà kuya mu Bwikadi bwà Nzambì to, Nzambì wa mu Dyulu awu, bwalu mashi à mbùji ne a mìkòòkò kaàvwakù mwà kuumusha mpèkaatù to.

⁹⁶ Kàdi Yèyè kwamba ne: “Bànà bèètù, Ndi Ewu unùdi nwènu nwela meeji ne ki Mémè awu. Mémè ki Dimiinu dyà mukàji adi. Mémè ki Mwànà wa Davidi awu. Mémè ki Mwànà wa Nzambì awu. Mémè ki Udi mulela kùdi virgo awu. Mashi Aànyi àfutù cibawu bwà bwalu abu. Nuvwa bindile mwinshì mwà mashi à mìkòòkò ne a mbùji, kàdi mpindyewu Mashi Aànyi àdi àfuta cibawu, nènku nwadishikàminyì. Tùbandàyaaku,

Pàasakà ukààdi wàmba kukumbana.” Anji elààyibi meeji, aci ncyà kùkaadi bidimu bitwè ku cinunu ne nkàmà citèemà ne byà mu njila, dilòòlò edi.

⁹⁷ Ndi mwà kuumvwa Abraham wàmba ne: “Mukalenge, patwàjuukà ne kwalukila cyàkàbìdi mu mubidi wètù; ne Sarah ne mémè tuvwa bacinangè bikolè be; bidì mwà kuKutàcisha bu twètù mwà kwimanakù mu ngàlà, katùpà kakesè, mu njila Webè amu anyi?”

⁹⁸ Èè, ndi mwà kuMuumvwa wàmba ne: “Mòna’s, to, ncyà bushùwà ne kabyàkuNtácishakù to. Nènshaalè ne bayiidi Bàanyi munda mwà matùkù matwè ku makùmi ànaayi. Anji kènzakanaayi nùmonè mùdi bintu byònsò bimwèka!”

⁹⁹ Mu dindà dya butùmbi adi dya Paasakà (mutwàngacilà mu dindà, bu Mukalenge mwà kwanyisha) pàakabiikàYe ku bafwè, Bible mmwambè, bilondèshile Maatàayi Munsantu 27, ne “Bààbúngì bàà ku bansantu bàvwà balàale mu lupwishi lwà buloba, bàakabiika ku lufù ne kupàtuka mu nkità.” Bàvwà mbanganyi abu? Abraham, Izàkà, Yakòbò, Yobò, aba bàvwà ku dibuulula dya nyumà dibàbuulwila bamanyè ne Mupikudi ùvwa mwà kwimana pa buloba dingingà ditùkù abu. S’ki bòbò abu, mamuma a ntwàdijilu a aba bàvwà balàale. Ki bòbò bàdi bàbwelà mu cimenga amu abu. Ndi mwà kumòna Sarah ne Abraham, bitènde, ne bùle tètè ne . . . ne balenga kwìsù, ne— ne bùle tètè ne makàndà tumatuma, kabàciyikù kàbìdi mwà kukùlakaja to, kabàciyikù kàbìdi mwà kusaama to, kabàciyikù kàbìdi mwà kuumvwa nzala to, bènda bèndakana mu mubidi wàbò awu.

¹⁰⁰ Kaayifà mwimàne mwaba awu, wàmba ne: “Nudi bamanyè mùdi bwalu anyi? Ditùkù adi nkwenzèke bwalu’s, anji tàngilàayi cimvundù cidi mu ntempèlù ewu eci! Kùdi. . .Nebikengelè bwà twètù kupetakù muntu udi mwà kutela cilàmbà-cikùdika cyàcyà. Tàngilàayi byàbya, kashèètè kàà milàmbù katònkola. Cidi cyenzèke ncinyi? Muntu awu ùvwa mulongi wa mabùlungà a muulu anyi? Ùvwa muloji anyi? Anyi, cidi cyenzèke ncinyi? Ambàayaaku túng! Lwilàbi apa túng, Josèphe, bàba babàkà bàà bitende bàdi biimàne pàpa nàka mbanganyi’s?”

Abraham kwambayè ne: “Sarah, bàtùjingùlùlù. Mbimpè tùpatukè’s.”

¹⁰¹ “Bààkamwènekela bààbúngì!” Kì nkujika to. Bwà kujikija, tàngilàayi. Dingingà ditùkù Yèyè mumanè. . . bamanè kwendakana; Abraham, Izàkà, Yakòbò, ne bakwàbò bònsò abu bamanè kwendakana mu buloba bwàbo abu. Pàakabàndà Yesù. . .

¹⁰² Wèwè udi wamba ne: “Mwanètù Branham, aci mbwalu bukwàtakaja anyi?” To, mukalenge! Nènkuleejè mu Mifundu, mu katanci kakesè emu.

¹⁰³ PàakabangàYe kubànda, bààkaMumòna ànu Yèyè, kàdi bansantu bàà Dipungila Dikùlukulu bàakaya pàmwè Nendè,

bwalu Bible mmwambè ne “Wàkakwàta bupika ku bupika, ne wàkapèesha bantu mapà.” Nènku ndi mwà kuMumòna pàdiYe wènda ùbànda apu, ne ùdìsanga pàmwè ne èkèleeziyà Wendè.

104 Banjèlò bàbìdì bàà mu musùmbà wà bàvwà bimba mijiki abu, bààkaalukila, bàmba ne: “Nwènù beena Ngalèlè, bwà cinyì nudi biimàne batàngìle muulu? Bwalu Yesù umwèumwè, uvwa mwangàciibwe muulu ewu, neàlukilè cyàkàbìdì.” Ncyà bushùwà’s wè! Kwàlukilabò lùkàsà bwà kadìsanga ne mulongo wà kadyàmashìnda awu.

105 Nènku Yesù ne bansantu bàà mu Dipungila Dikùlukulu kukòsololabò mu maułu kuyabò. Kupitabò ngondo, kupitabò dībà, kupitabò mìtootò. Nènku pààkafikàbo kumpàlà kwà Maulu manène, malenga ne matòòkè mwàmwa, bansantu bàà Dipungila Dikùlukulu abu kwelabò lubilà lukolè, bàmbulula Mufùndu ne: “Ambùlùkaayi, nwènù biibi byà kashidi, ne shààlaayi bambùlùke! Ambùlùkaayi, nwènù biibi byà kashidi, ne shààlaayi bambùlùke! Nènku Mfùmù wa Butùmbì àbwelè!”

106 Banjèlò bònsò kukùngwilabò kumutù kwà tuumakunji twà kubàndila twà mu Dyulu, bàmba ne: “Mfùmù wa Butùmbì ewu Nganyì?”

107 Bansantu bàà Dipungila Dikùlukulu kwambabò ne: “Mukalenge wa bilwilu, mukolè mu mvita! Yèyè ùvwa Mucìmunyi!”

108 Mwanjèlò kutwàye munu pa mbotè munène awu, ne biibi byà mabwe a masàngà abi kunzulukabì.

109 Mucimunyi munène, wa bukolè awu kukòsololaYè Cimenga cyà Yèlusàlèmà aci, mulwè ne bansantu bàà Dipungila Dikùlukulu. Cisùmbù cyà Banjèlò cimònàngàne ne mijiki, pàvwà Banjèlò abu munkaci mwà kwela mbilà. Yèyè ùvwa Mucìmunyi wa bukolè! Yèyè ùvwa ne nsapì yà lufù ne yà ifernò milembèlèle ku luseke Lwèndè, wènda ùpwèka ùpita mabàlaasà a Butùmbì awu too ne mwàkafikàYe ku Nkwasa wa butùmbì. Ki kwambaYè ne: “Taatù, ki bòbò aba. Bàvwa biitabùùje, mu diitabuuja dyà Dìyi Dyèbè ne, dīngà ditùkù Ngaadyàkulwa. Ngàcìmunu ne lufù ne ifernò.” Cìvwa ncinyi aci, mwanèètù? Ùvwà ne bibangu mu cyanza Cyèndè, bwà kuleeja ne Ùvwà mu mvità. Butùmbì kùdì Nzambì mu Dyulu ditàmbe kutùmbuka! Yèyè m’Mucìmunyi wa bukolè! “Ki bòbò aba, Taatù; Abraham, Izàkà, ne Yakòbò.”

110 Ndi mwà kuMuumvwa wàmba ne: “Mwanàànyì, bàndilà ku luseke Lwànyì eku, ùsòmbè too ne pàNgààvwijà mwena lukunà yònsò citèèkedi cyà makàsà Èbè.” Mwanèètù, dīngà ditùkù Yèyè neàlwe cyàkàbìdì, nènku necìikalè ditùkù kaayi’s wè!

111 Kàvwa musòmbè mu lulèngù pàvwàYe mu lukità apu to. Tudi twela meeji ne Yèyè ùvwà ànu kacya wàlààla muntwamu, mufwè. Kàdi Ùvwà mupwèkè mucìkàlè ùcimuna ànu kucìmuna, KupwèkaYè e kunyènga Sàtaanà nsapì, Ùdì ne nsapì ne yà lufù

ne yà ifernò, dilòòlò edi. Wákamba ne: “Bwalu Mémè ndi ne mwoyi, nwénù pèènú, nudi mwà kwikala ne mwoyi.”

112 Ndi ndikonka dilòòlò edi, mwanèètù wa balùme munanga, mwanèètù wa bakàji, ukàadiku mwelàngàne meeji pa bwalu abu ne meeji matòòkè anyi? Udikù ufika ku dimanya ne udi ne mwoyi ànu bwalu Yéyè ùdì ne mwoyi anyi? Wacyányishiku bikùmbàne bwà kudilàmbula wèwè mwine, wamba ne: “Nzambi, ki mémè ewu, ngènzàmpèkààtù, ikàlàku naanyi luse” anyi? Kacya ukàadiku mwitàbe Mulambu wùdì mukùmbàne mu byònsò awu anyi? Kacya ukàadiku muMwambile ne udi muMunangè anyi? Bitukù bikutàpa ku mwoyi pawùtu wenza cilèma anyi? Pawikalà kacya kùyikù mwanji kufika ku dilabula adi mpindyewu, mu dijiikiibwa edi! Pàdibi ne, dîbà dyètù dikaadi dyènda dîya. Ndi ndyùmvwa ànu bìmpè! Kàdi, ndi ndikonka, ní kacya kùtukù mwanji kwakidila Kilistò bu Musùngidi webè sungasunga to, Ndi ndikonka ní udikù mufwànyine kwenza nankù patùdì twinyika mitù yètù ànu bwà katanci kakesè bwà mwakù wa disambila apa.

113 Imbàku ne: *Munkaci Mwà Mbwebwe Yitaayika*, bu wèwè mwà kuswà, Mwanèètù wa bakàji Gertie, pawikalà naawù. Èyo, cyònsò ciwimba aci cidi mwà kukùmbana.

114 Ne mitù yènù miinyika, nènñwèlè lukonko lwà meeji matòòkè a menemene. Nwavùlukaayi nwénù balundà bàànyì, ngènzàmpèkààtù anyi munsantu, kî nè kwènàku patùdì tukujiika to. Musùùkà wèbè wùdì mu mwaba kampànda. Mpindyewu, Yesù wakaya mu myaba yònsò yibidì ayi, bilondèshile Mifùndu. Mmufwànyine kukusangana penyì bu wèwè mwà kuya dilòòlò edi? Mbafwànyine kukukàngila ciibi cyà luse mumpàla ne, bwalu udi mulùbènge anyi? Vùlukà ne, Yéyè kèna ànu Musùngidi pàtupù to, Yéyè m’Mulumbulwishi. Wèwè ki mulumbulwishi mpindyewu, udi uMulumbulwisha bìshi? Lekèlà Yéyè ikalè Musùngidi webè mpindyewu.

115 Kaabwalu kakesè kampànda nyewù kàndwila mu meeji. Kùkaadi cikondo kampànda mwànà mukèsè wa balùme ùvwa musòmbe mu—mu ditempu. Cingoma kutuutaci kwìnshì kwà müsèèsù aku, ne tubalù kuvùkutatù lubilu, tùvwà tùya tutangile ku mweleelu kwà mabwe matùmbùke. Nsongàalùmè kampànda mulami wa ngombe kuyayè lubilu e kwimanyikayè tubalù atu kumpàla kwà ditempu adi kudyèladì panshì dyùmukila kuulu kwà mabwe matùmbùke aku, bwalu mùvwa mwànà wa mu dibòko. Kusùngilayè mwoyi wà mwànà mukèsè awu.

116 Bidimu byàbùngì paanyimà pàà cyòci aci, yéyè ewu ùvwa mwimàne ku tubàdì. Mwànà wa balùme umwèumwè ewu ùvwa mwenzè bwenzàvì, mulondè njila mubì, mwikàle mupiiile. Ùvwa ùnwa maalà, ùnàya twarta twà mfrangà, kwasayè muntu ku cingoma; ùvwà mupiiile, musangànyiiibwè mupiiile. Ki nzujì kujuuka e kwambayè ne: “Ndi nkukòsela cilumbù bwà

bàkwowèlè mu diminu amu too ne pìlmanà mwoyi webè wà cifwàkà awu.”

117 Nsongààlùmè awu kwambayè ne: “Nzujì!” Ki kwimakajayè bulondyanganyi bwà tubàdì, pàakatùpikàye milonda ya ku tubàdì ne kudyèla ku makàsà a nzuji awu, ùlòmba luse. Yèyè ne: “Nzujì, ntàngilèku kwìsù kwànyì eku! Kwéna mummanyè anyì?”

Yèyè ne: “To, mwanàànyì wa balùme, ncyèna mukumanyè to.”

118 Yèyè ne: “Udikù uvùluka mwoyi wà mwànà mukèsè kampànda wa balume wuwàkasùngilà, kùkaadi bidimu byàbúngì, ku kabàlù kàvwà kàya lubilu lukolè anyì?”

Yèyè ne: “Èyo, ngàcivùluku.”

119 Yèyè ne: “Mémè’s ki yèyè mwànà awu.” Yèyè ne: “Nzujì, wàkansùngilà díbà adi. Nsùngilèku mpindyewu’s!”

120 Nzujì kupwekesha mèsù e kumutangila, kwamba ne: “Mwanàànyì, ditùkù adi mwà musùngidi webè. Leelù ewu ndi mulumbulwishi webè.”

121 Leelù Yèyè m’Musùngidi webè, wèwè ngènzàmpèkààtù, mààlabà Yèyè ùdi mwà kwikala Mulumbulwishi webè. Twèlanganààyìkù meeji pa bwalu abu mpindyèwu, pàdì mùjìkì wimba apa. Ne muntu yònsò munkacì mwà kusambila, aba bàdi mu cipaapu cyà masambila ne Nzambì abu.

122 Ndi ndìkonka dilòlò edi mpindyewu, ne lukasa lwònsò, aba bàdi baswè kwitaba Kilistò bu Musùngidi wabò sungasunga abu, bàmbè ne: “Nzambì, ikàlàku naanyì luse, mémè ngènzàmpèkààtù ewu. Ndi muswè kulwa ku Mashi meela panshi. Ngàcyòku ne byà dikashààlashaala wa mu maèkèleeziyà ne dinyeemakana kutwà eku ne eku abi. Ndi muswè kulediibwa cyàkàbìdì. Ndi njinga dilabula mu mwoyi wànyì dyà ne ndi mumanyè ne Kilistò mmuDibuulùle kùndì, ku dibuulula dyà nyumà dyùdì ufùma ku dyamba adi, Mwanèètù Branham. Ndi muswè dibuulula dyà nyumà, Nyumà Mwímpè munda mwà mwelè wànyì, ùmvwija ne mwoyi, ùtamba kuvwija Kilistò mulelèlè kùndì kutamba mùndì kùndì mémè mwìnè. Ndi njinga dilabula adi, Mwanèètù Branham. Udikù mwà kunsambidila pàndì mwelè cyanza cyànyì muulu apa anyì?” Swàku wélè cyanza cyèbè muulu mpindyewu, wèwè udi ujinga bwà bàkuvùlùkè awu. Nzambì àkubènèshè, inàbànzà. Nzambì àkubènèshè paanyima apu, inàbànzà. Abi mbímpè. Nzambì àkubènèshè, mukalenge. Abi mbímpè. Elàayi byanza muulu, mpindyewu tìngunukà ne cyanza cyèbè aci.

123 Mmunyì mùdikù mufwànyìne kufwà bundù? Udi mufwànyìne kubènga cintu bu Aci anyì, mulundà wanyì? Wavùluka’s.

124 “Kaa,” mùdì wamba, “Mwanèètù Branham, bayiishi’s bàdi bàyiisha kùkaadi bidimu.” Ndi mumanyè, kàdi dimwè dyà ku

matùù aa s'nebàlekele kuyiisha. Ne mùshindù wùdì maalu àmwèka, mbifwànyine kwiikala ànu mpindyewu. Newikalè mwà kuumvwa diyiiisha dyèbè dyà ndekeelu. Bwà kwamba menemene, edi's ndifwànyine kwikala dyèbè dyà ndekeelu.

125 “Kaa,” mùdì wamba, “mémè's ncidi mwànà.” Aci kí mbwalu to. Lufù kalùtu lùneemeka muntu, anyi búngì bwà bidimu anyi dikùmbanyina to.

126 Udikù mpindyewu mwà kuMwitaba bu Musùngidi webè sungasunga, pa kwela cyanza cyèbè muulu, kwamba ne: “Nzambi, ikàlàku naanyi luse” anyi? Elàayi byanza byènu muulu pàmwè ne bakwàbò baa ku aba aba, nwàmbè ne: “Mpindyewu ndi muswè kwitaba Kilistò.” Udikù mwà kwela cyanza cyèbè muulu anyi?

127 Muntu udi mutwè cìmpìngà, àmbè ne: “Nzambi, ikàlàku naanyi luse. Ndi muswè kwalukila kùdì Kilistò dilòòlò edi, bwà màalabà ikalè dibiiikà dyà ku lufù, dipyadiyà, bwànyì mémè.” Nudikù mwà kwela byanza muulu anyi? Elà cyanza cyèbè muulu, wàmbè ne: “Ikàlàku naanyi luse. Ndi muswè kulwa mpindyewu.” Udikù muswè kucyènza anyi? Elà cyanza cyèbè muulu, wàmbè ne: “Ndi muntu mutwè cìmpìngà, kadi dilòòlò edi...” Nzambi àkubènèshè, inàbànzà. Nzambi àkubènèshè. Abi mbìmpè. “Ndi muswè kwitabuuja Kilistò bu Musùngidi wanyì sungasunga. Ndi muswè kuMwitabuuja dilòòlò edi. Ndi mulalàkàne, bidimu byàbùngì kule ne Nzambi, kadi mpindyewu ndi mpingana kumbèlu.” Udikù mwà kuMwitaba dilòòlò edi, bwà eci cìikalè dibiiikà dyà ku lufù dipyadiyà bwèbè wèwè, bwà nsòmbelu wèbè wa kale awu àjikè anyi?

128 Inàbànzà ewu nyewù ùlwa ku cyoshelu, bwà kwenza ditonda dyèndè, bwà kwimanayè. Kùdikù mungà muntu udi muswè kwangata kaaba kèndè apa, kubànda kùneeku pàmwè nendè, mu ditonda dyèndè anyi? Udikù mwà kujuukila kuulu, ne kubànda ku cyoshelu anyi, wèwè pèèbè? Cyoshelu ncyeci bwàshì. Cyà bushùwà. Bànda buludì, mpindyewu mene. Wèwè muswè kwimana kaaba aka bwà kusambila, nebiiikalè ànu bìmpè. Seemènà. Udikù mwà kulwa anyi? Mwimànyine pa ditonda dyà diitabuuja dyèbè, pa diitabuuja dyèbè mu Mwànà wa Nzambi, udikù mwà kulwa mpindyewu anyi? Èyo.

129 Aci ncikutàngile's, wavùluka. Ncikutàngile ànu wèwè. Wèwè udi ngènzàmpèkààtù anyi? Udi muntu mutwè cìmpìngà anyi? Udi mukwàte mashika ne kule ne Kilistò anyi? Kadi udi muswè kubiishiiibwa mupyamùpyà pàmwè Nendè mpindyewu, kubanga nsòmbelu mupyamùpyà anyi? Kadi nwènù, mulùme ne mukàjièndè bàtù ànu—bàtù ànu bàpangàkàne kùkaadi ntàntà mule, nukòkangana kumbelu kwènù abu? Kanwènaayikù baswè kulwa bwà kulongolola bwalu abu kumpàlà kwà Nzambi ne muntu ne mukwèndè mpindyewu anyi? Vwijaàyikù Paasàkà bulelèlè Paasàkà bwènù nwènù, nubangulula dikù dipyadiyà.

¹³⁰ Kàdi nwènù bàtù kacya kanùyikù, kacya kanùyikù nwenza disambila mu dĭkù dyènù, nuumuka ànu ku èkèleeziya nuya kumbèlu ne nuteeta ne mwènù mwònsò bwà kwikala ne nsòmbelu mwímpè, cibi kacya kanùyikù mwà kusangisha dĭkù dyènù pàmwè bwà kusambila? S'ki bwà cinyi tudi ne dinyanguka dyà nsòmbelu wa bânà ne maalu atùdì naawù aa. S'ki bwà cinyi mĕkù à beena Àmèrikè mmapandùlùkè. Kanwènaayiaku baswè kulwa, kubangulula dilòòlò edi anyi? Nudikù baswè kwenza nànkù anyi? Nudi babiikidiibwe. Vùlukàayi ne, mĕmè ndi mwambi wenù mpindyewu; nĕngìkalè ntemu mu ditùkù adi.

Patùdì ne mitù yètù miinyika apa, nenku, mpindyewu bwà disambila.

¹³¹ Taatù wetù wa mu Dyulu Mubèneshiibwè, dilòòlò edi nyewù tuKutwàdila batèeleji aba, mu cikondo citàmbe kwikala cyà kaciyi tuseku ne cinsantu citùdì bamanyè. Tudi tuseemena ku Nkwasa Webè wa Butùmbi ne didipwekesha dyònsò. Nĕnku paanyimà pàà Dyiisha dilòòlò edi, dyà ne, dijiikiibwa dinène adi, Yĕyè kààkashàalakù mupùwe to, musùukà Wĕndè wàkatungunuka buludi e kubwela mu myaba ayi ne kujikija mudimu wà Nzambi, wùvwa mulongolola bwà Yĕyè kwenza awu. Ne maalabà mu dindà, tudi tujandula kwàkayàYe mu bipaapu byà muulu, wènda ùcimuna byònsò, mu dibiikà Dyèndè dyà ku lufù adi. Kàdi kupàtukaYè mu dindà dyà Paasàkà bwà dibingishiibwa dyètù. Ne tudi tusangana ne Wàkatùma Nyumà Mwímpè, bwà kutwisha bantu bwà mpèkaatù.

¹³² Nĕnku tudi tulòmba dilòòlò edi, Mukalenge, bwà ne aba bàdi bèèlè byanza byàbò muulu abu bààmòna mwà kubàvùlukabò kumpàlà Kwèbè. Swàku bwà dipàngadika dyàbò dyàngaciibwè mu mwoyi wàbò dilòòlò edi, dyà ne bààKwakididì, ne bààKwitàbùùjì adi, ne swàku bwà bàtwibwè citampì ku Citampì cyà mulayi dilòòlò edi, Nyumà Mwímpè. Enzàku nànkù, Taatù. Bwalu, tudi tubàlambula Kùdi, pàmwè ne Mukenji ewu dilòòlò edi. Swàku bwà Wòwò kubènesha aba bàWùtèeleji, bòbò abu, Mukalenge, bààyà naaWù kwàbò kumbèlu abu, ne kuWùpwekesha mu ndòndò wa mwoyi yàbò. Swàku bwà biikalè ne mwoyi ku Dĭyi dyà Nzambi. Enzàku nànkù, Taatù, bwalu tudi tulòmba nùnkù mu Dĭnà dyà Kilistò. Amen.



DIIKIIBWA LUA57-0420
(The Entombment)

DILONDANGANA DYÀ MALONGESHA PA DITÀBULUJA DYÀ PAASÀKÀ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisambòmbò dilòlò, mu matùkù 20 a ngondo mwinâyì, cidimu cyà 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa méyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org